

Organisacion Musica cu sosten pa engrandece CAISO & SOCA Monarch riba nivel internacional



ORANJESTAD -- Cu e celebracion di e 60 edicion di Aruba su Carnaval, Minister di Turismo, Transporte, Sector Primario y Cultura Otmar Oduber conhuntamente cu Oficina di Turismo

(ATA), Departamento di Cultura Aruba (DCA) y Organisacion Musica a firma un MoU cu lo apoya Organisacion Musica pa pone Festival di CAISO & SOCA Monarch riba pia

tanto na nivel local como riba nivel internacional. Minister Otmar Oduber a indica cu musica ta un elemento hopi importante pa Carnaval di Aruba, pues motibo suficiente pa brinda apoyo na nos Festival di CAISO & SOCA Monarch.

BALOR DI MERCADEO

Sr. Hildward Croes di Organisacion Musica a splica cu e musica cu ta wordo produci dor di compositor, arreglista y musiconan local durante e temporada di Carnaval, a demostra di no ta wordo uza solamente pa e temporada di Carnaval, sino durante henter aña. Mas ainda, mirando e balor di mercado cu e musica di Carnaval tin pa nos isla ta haci'e un factor hopi importante. Organisacion Musica



ta sumamente contento cu e reconocimiento aki, pa loke ta trata musica y principalmente e atencion cu e Festival di CAISO & SOCA Monarch ta hayando, caminda ya caba ta premira cu e festival di e aña aki lo surpasa tur record cu e la yega di conoce, Sr. Croes ta bisa.

LOGISTICA

Manera Sr. Croes ta splica e apoyo financiero aki ta uno hopi importante pa por logra presenta e festival aki riba e nivel cu tanto ta desea. Ta asina cu pa por logra ehecuta un festival di e magnitud di un CAISO & SOCA Monarch, ta rekeri un logistica hopi grandi. Mas ainda mirando cu esaki ta su di dos aña y cu e aña aki e lo conoce un ubicacion nobo cu ta Carnaval Village den curason di San Nicolas. Organisacion Musica lo conta cu un apoyo

financiero di total 35 mil florin pa asina aki sostene e festival di CAISO e aña aki.

MERCADO INTERNACIONAL

Meta tras di e acuerdo aki ta pa asina yuda pone festival aki bek riba pia cu e intencion pa otro aña hiba esaki riba nivel internacional. Lo bay brinda e sosten pa mercadea e festival aki riba mercado internacional y regional pa asina aki atrae bishitantenan pa asisti na un festival di caliber halto, haciendo di e festival di CAISO un atraccion turistico mas, ta loke Minister Otmar Oduber a indica.

Organisacion Musica na nomber di henter e comunidad musical di Aruba ta gradici Minister Oduber, DCA y ATA pa e gran apoyo brinda na e Festival di Aruba su CAISO & SOCA Monarch. □